

Remaja cuba seludup minyak masak, gula ke Indonesia ditahan

17 Julai 2019 9:04 PM



BOT jongkong yang dirampas PPM Tawau di Kuala Sungai Log Pond, Tawau, Sabah semalam. - UTUSAN ONLINE/Ihsan PPM Sabah

TAWAU 17 Julai - Pasukan Polis Marin (PPM) Tawau menahan seorang remaja lelaki dengan bot jongkong membawa muatan barangan kawalan gula pasir serta minyak masak dipercayai untuk diseludup ke Indonesia melalui kawasan Kuala Sungai Log Pond dekat sini, semalam.

Komander PPM Wilayah 4 Sabah, Asisten Komisioner Mohamad Pajeri Ali berkata, remaja 18 tahun itu ditahan ketika membawa 1,020 kilogram (kg) minyak masak serta 660 kg gula pasir pada pukul 5.30 petang.

"Pantauan PPM dalam Op Gelora Khas membawa penemuan cubaan menyeludup keluar 153 pek minyak masak Cap Bunga serta 867 pek minyak masak Cap Kapal, selain 660 pek gula pasir Cap Gula Prai, untuk pasaran Indonesia," katanya dalam satu kenyataan di sini, hari ini.

11 Katanya, pemeriksaan lanjut turut mendapati suspek gagal menunjukkan permit atau surat kelulusan daripada pihak Kementerian Perdagangan Dalam Negeri Dan Hal Ehwal Pengguna (KPDNHEP) atas kesemua barang-barang kawalan yang dibawa.

Mohamad Pajeri berkata, kesemua rampasan termasuk dua unit enjin dan sebuah jongkong dianggarkan berjumlah RM62,497.

Katanya, kes itu diserahkan kepada pihak KPDNHEP Tawau untuk tindakan dan siasat lanjut. -BERNAMA



ANTARA barangan yang dirampas dalam tangkapan semalam. -